



Stigtingsjaar 1909

Tel. 086 133 3786
Faks 012 001 8787
E-pos: akademie@akademie.co.za
Webwerf: www.akademie.co.za

Ziervogelstraat 574
Arcadia, Pretoria

20 Mei 2020

SA AKADEMIE VIR WETENSKAP EN KUNS: BEKRONINGS VIR 2020

PERSVRYSTELLING (Vir onmiddellike vrystelling)

Die Raad van die Suid-Afrikaanse Akademie vir Wetenskap en Kuns maak die gesogte Akadembekronings vir 2020 bekend.

Die wenners is waar moontlik reeds oor die bekronings ingelig. 'n Aankondiging in verband met die oorhandiging van die pryse sal in 'n later stadium deur die Akademieraad bekendgemaak word.

1. ERELIDMAATSKAP VAN DIE SA AKADEMIE

Erelidmaatskap is die hoogste eerbewys van die SA Akademie en word toegeken op grond van een of meer van die volgende lewenslange prestasies: Erkenning van buitengewone dienste aan Suid-Afrika; en/of dienste aan die Afrikaanse taal; en/of dienste aan die SA Akademie in die besonder met betrekking tot die hoofdoelstelling van die Akademie, naamlik die bevordering van die wetenskap, die tegnologie en die literatuur in Afrikaans en van die kunste, asook die gebruik en die gehalte van Afrikaans.

Die Erelidmaatskap van die SA Akademie word vanjaar toegeken aan **prof. Jacques van der Elst**, emeritus dekaan van die Fakulteit Lettere en Wysbegeerte van die Noordwes-Universiteit en voormalige hoof van dié universiteit se Kantoor vir Internasionale Betrekkinge. Prof. Van der Elst is ook 'n vorige hoof- uitvoerende beampte van die SA Akademie.



Prof. Jacques van der Elst

2. HERTZOGPRYS VIR POËSIE

Die Hertzogprys is die vernaamste prestigeprys in die Afrikaanse letterkundige wêreld en heet na 'n groot kampvegter vir Afrikaans, genl. J.B.M. Hertzog. Die prys is beperk tot oorspronklike letterkundige werk in Afrikaans en word jaarliks om die beurt toegeken vir poësie, drama en verhalende prosa op aanbeveling van die Akademie se Letterkundekommissie.

Die Hertzogprys vir Poësie word vanjaar toegeken aan **Johan Myburg** vir *Uittogboek*.



Johan Myburg

Die prys word geborg deur *Rapport*.

Navrae oor hierdie prys kan gerig word aan prof. Hennie van Coller.
E-posadres: vcollerh@ufs.ac.za of selfoonnr.: 082 825 9743.

3. M.T. STEYNPRYS VIR NATUURWETENSKAPLIKE EN TEGNOLOGIESE PRESTASIE

Die prys word toegeken aan 'n persoon vir sy/haar skeppende bydraes tot die ontginning, organisasie en volgehoue uitbouing van die natuurwetenskap en/of die tegnologie (of 'n vertakking of vertakkings daarvan) en die suksesvolle toepassing daarvan in breër verband, soos in landsbelang. Die prys word gesien as die kroon op 'n lewenstaak en kan daarom net een maal aan 'n persoon toegeken word.

Die prys word vanjaar aan **prof. Ben-Erik van Wyk** van die Departement Plant- en Plantbiotegnologie, Universiteit van Johannesburg toegeken.



Prof. Ben-Erik van Wyk

Prof. Ben-Erik van Wyk is 'n internasionale leier op die gebied van die benutting van inheemse plante en planttaksonomie en is een van die mees produktiewe planttaksonome wêreldwyd. Hy en sy groep Afrikaanse studente het byvoorbeeld 'n groot bydrae gemaak om die tradisionele kennis van die Afrikaanssprekende Nama- en Khoisan-inwoners in Namakwaland na te vors en aan te teken. 'n Verstommende nuwe kennis is hierdeur ontbloot. Dit sluit nie net nuwe gebruike en nuwe name in Afrikaans en Nama in nie, maar die data is met die modernste tegnieke geanaliseer en belangrike resultate is daardeur bekom. Hierdie werk skep die geleentheid vir baie navorsers om verdere werk te doen oor die tradisionele kennis van hierdie groepering wat tot dusver grotendeels onontgin is.

Die prys word deur Sanlam geborg.

4. HUBERTE RUPERTPRYS VIR KLASSIEKE MUSIEK

Die prys word toegeken aan die operasangeres **me. Carla Pohl**.



Carla Pohl

Me. Pohl word wêreldwyd deur kritici beskou as een van die laaste werklik hoë dramatiese soprane van ons tyd. Sy is in 1965 bekroon met die Mimi Coertse-beurs, wat haar in staat gestel het om 'n sangloopbaan in Duitsland te volg, waarna sy 'n internasionale reputasie verwerf het met haar vertolkings in Duitse operarolle. Sy is wêreldbekend vir haar rolle in operas van Wagner en van Richard Strauss. Die lys operateaters waar Pohl in hoofrolle opgetree het is onder andere die volgende: Aachen, Berlyn, Bonn, Braunschweig, Darmstadt, Dresden, Dortmund, Düsseldorf, Essen, Gelsenkirchen, Giessen, Haltern, Hanover, Karlsruhe, Köln, Kiel, Leipzig, Leverkusen, Mainz, München, Oldenburg, Stuttgart, Wolfsburg, Londen, Bern, Luzern, Wene, Antwerpen, Helsinki, Bordeaux, Nancy, Parys, Moskou, Rome, Turyn, Brisbane, Santiago, Durban, Johannesburg, Kaapstad, Pretoria.

Die prys word deur die Rupert Musiekstigting geborg.

5. BESONDERE EREPENNING

'n Besondere Erepinning word toegeken aan **prof. Antony Melck**, tans woonagtig in Oostenryk.

Prof. Melck se leierskapsrol op akademiese en intellektuele gebied in die Suid-Afrikaanse samelewing gedurende sy loopbaan is divers en omvattend; aanvanklik as professor in

Ekonomie by Stellenbosch, en later as rektor van Unisa en hoofbestuurslid van die Universiteit van Pretoria.



Prof. Antony Melck

Prof. Melck se betrokkenheid in verskeie gemeenskappe en sy veelsydigheid as persoon blyk uit die wye verskeidenheid ander leierskapsrolle wat hy oor vele dekades vervul het, onder meer - maar nie beperk nie tot - as direkteur van Kamermusiek van Suid-Afrika, raadslid van die Pretoria Kunsvereniging, trustee van die 'South African Institute for Distance Education' en beskermheer van die Staatsteater se Jeugkunsfees.

6. **BESONDERE EREPENNING**

'n Besondere Erepennig word ook toegeken aan **mnr. Tommie van Zyl**.



Mnr. Tommie van Zyl

In die 20 jaar sedert Tommie van Zyl hoofbestuurder van ZZ2 geword het, het die omvangryke boerdery wat sy vader uit 'n beskeie familieplaas ontwikkel het, verder eksponensieel vergroot. Hy het 'n revolusionêre "oop sisteem" bestuursmodel ingevoer om al die belanghebbers van ZZ2, wat insluit meer as 10 000 werknemers, saam te snoer in 'n geïnspireerde sisteem wat funksioneer soos 'n spreekwoordelike miernes, of natuurlike ekosisteem, van bedrywighede. Dit strek van produksie, verpakking en bemarking tot diensdepartemente soos finansies, korporatiewe dienste, logistiek, landboukundiges, ingenieurs, inligtingstechnologie, sekuriteit en vervoer.

Met sy soeke na beste wetenskap en tegnologie en sy eie stewige akademiese agtergrond word ZZ2 onder mnr. Van Zyl 'n sentrum van landbouwetenskaplike uitnemendheid. Sy direksie bestaan deurgaans uit 25% akademiëci. Hy werf konsultante en inisieer navorsingsprojekte by agt Suid-Afrikaanse universiteite, waarby tot op hede 27 vooraanstaande navorsers betrokke is en daarby baat. Hy bou ook sy kontakte met Amerikaanse universiteite uit, bv. Cornell vanwaar verskeie navorsers projekte by ZZ2 uitvoer, en betrek verder akademiëci van die universiteite van North Carolina, Florida, California, Washington en Oregon. Hy werf ook verskeie konsultante van die beroemde Volcani-Instituut in Israel.

7. EREPENNING VIR DRAMA EN DIE GERHARD BEUKESPRYS

Die prys word toegeken aan **prof. Nico Luwes**, emeritus professor van die Departement Drama en Teaterkuns, Universiteit van die Vrystaat.



Prof. Nico Luwes

Prof. Luwes is een van die mees vooraanstaande figure in die Suid-Afrikaanse teaterbedryf. Dit is uitsonderlik dat hy binne hierdie bedryf, met die klem op opvoering, óók 'n stewige akademies-wetenskaplike bydrae gelewer het. Hy het in sy loopbaan verskeie rolle vertolk: dié van speler, regisseur, skeppende en akademiese skrywer, dosent, entrepreneur en beskermheer.

In 'n uitsonderlike loopbaan staan sy skryfwerk egter uit. Prof. Luwes het reeds 'n groot aantal dramas en verhoogstukke geskryf en vertaal, sowel as 18 ander stukke verwerk. Al sy werk is nie net by die belangrikste Kunstefeeste (soos die KKNK; Vrystaatse Kunstefeeste, Woordfees, Aardklop, Grahamstadse Kunstefeeste, ensovoorts) opgevoer nie, maar ook in die buiteland (soos in die Tjeko Teater in Pavlodar, Kazakstan en die Rose & Crown Teater in Engeland). Prof. Luwes is 'n veelsydige teatermens wat ook die musiek gekomponeer het vir 'n musiekblyspel wat hy self geskryf het. Daarnaas is hy die uitstekende regisseur van meer as 100 produksies.

8. EREPENNING VIR DIE BEVORDERING VAN GESKIEDENIS

Hierdie Erepennig gee erkenning vir 'n besonder hoogstaande bydrae tot die bevordering van die geskiedenis of kultuurgeskiedenis as dissiplines in Suid-Afrika.

Die Erepennig word vanjaar toegeken aan **prof. Matilda Burden**, 'n kultuurhistorikus, verbonde aan die Universiteitsmuseum van die Universiteit Stellenbosch.



Prof. Matilda Burden

Prof. Burden se werk en bydraes in die vakdissiplines kultuurgeskiedenis, erfenisstudies en bewaring strek oor 'n tydperk van 43 jaar. Loopbaangewys word haar werk gefokus op navorsing, doseerwerk, en die ontwerp en inrig van museumuitstallings. Haar werk dek verder die totale spektrum van kultuurgeskiedenis wat die subterreine volkskunde, museologie, erfenisstudies en bewaring insluit.

9. EREPENNING VIR VISUELE KUNSTE

Die Erepennning vir Visuele Kunste word toegeken aan dr. **Esther Mahlangu**.



Esther Mahlangu

Die 85-jarige dr. Esther Nikwambi Mahlangu is dwarsoor die wêreld bekend vir die monumentale muurskilderye wat sy al geskilder het in kunsmuseums van Italië tot Amerika; vir uitstallings van haar werke op doek in meer as 25 lande en selfs vir die

beskildering (en verheffing tot kunswerk) van meer as een model BMW vir the BMW Art Car Series wat sedert die 1990's ander groot name soos Andy Warhol, David Hockney en Roy Lichtenstein ingesluit het. Esther Mahlangu is absoluut gewortel in haar Nzunza Ndebele gemeenskap, in die klein dorpe Mthambothini, Mpumalanga, setel van die koninklike Nzunza Ndebele familie. Hoewel beroemd en 'n globale sukses, word dr. Mahlangu en haar werk uitsluitlik gemotiveer deur haar Ndebele erfenis en die oordra daarvan aan geslagte na haar.

Die toekenning van 'n eredoktorsgraad deur die Universiteit van Johannesburg aan me. Mahlangu op 9 April 2018, en later 'n tweede ere doktorsgraad toeken deur die Universiteit van KwaZulu Natal, verteenwoordig slegs twee hoogtepunte in die lewe van hierdie beskeie kunstenaar. Sy het tentoonstellings aangebied in vele lande dwarsoor die wêreld wat insluit Meksiko, Switserland en Australië, en haar werke pryk vandag in kunsversamelings in Suid-Afrika, Duitsland, Frankryk, die VSA en Japan. Sy is reeds bekroon met verskeie noemenswaardige toekennings, onder andere die Orde van Ikhamanga in die silwerklas in 2006, die Mpumalanga Kuns- en Kultuurtoekenning, en 'n toekenning van die Ministerie van Kultuur van Frankryk.

10. L.W. HIEMSTRAPRYS VIR NIEFIKSIE

Die toekenning van die prys word driejaarliks oorweeg vir 'n oorspronklike niefiksie werk in Afrikaans wat nie beperk is tot vakspesialiste nie.

Die prys is vanjaar toegeken aan **Elsa Joubert** vir *Spertyd*.



Elsa Joubert

Die prys word geborg deur die Louis Hiemstra Trust.

Navrae oor hierdie prys kan gerig word aan prof. Hennie van Coller.
E-posadres: vcollerh@ufs.ac.za of selfoonnr.: 082 825 9743

11. ELIZABETH C. STEIJNMEDALJE

Hierdie medalje is ingestel om 'n leerkrag te bekroon wat sy of haar opvoedingswerk deur medium van Afrikaans doen en wat hom of haar onderskei het op die gebied van praktiese onderwys en opvoeding binne sowel as buite die klaskamer. Die medalje is vernoem na mej. Elizabeth C. Steijn, 'n voormalige hoof van die Afrikaanse Hoër Meisieskool in Pretoria.

Die prys word vanjaar toegeken aan **mnr. J.M. (Johan) Bezuidenhout**, Uitvoerende Hoof, Leeuwenhof Akademie.



Mnr. Johan Bezuidenhout

Mnr. Bezuidenhout is die afgelope 45 jaar verbonde aan die onderwys, waarvan hy 25 jaar die skoolhoof en die afgelope sewe jaar die uitvoerende hoof van Leeuwenhof was. Hy stel deurlopend belang daarin om 'n hoë vlak in die onderwys te handhaaf en voortdurend te verbeter. Sy vakgebied is Afrikaans, maar daarbenewens het hy deur sy loopbaan hom beywer om die wetenskappe ook uit te bou en 'n liefde daarvoor by leerders te kweek. Die moderne wetenskaplaboratorium van die skool het deur sy toedoen tot stand gekom wat sigbaar die waarde van die wetenskap toon.

12. HAVENGAPRYS VIR FISIESE WETENSKAPPE

Die Havengaprys is 'n jaarlikse prestigeprys wat toegeken word vir oorspronklike navorsing op natuurwetenskaplike en/of tegnologiese gebied. Die prys kan net een maal aan 'n persoon toegeken word.

Die prys word toegeken aan **prof. J.A.C. Weideman**, verbonde aan die Departement Wiskundige Wetenskappe, Universiteit Stellenbosch.



Prof. J.A.C. Weideman

Vir die afgelope 30 jaar was prof. Weideman een van die mees kreatiewe figure by die koppelvlak van komplekse analise en numeriese algoritmes vir oplossings van partiële differensiaalvergelykings, met spesifieke temas wat kwadratuur, kontoerintegrale en rasionale funksies insluit.

'n Kenmerkende eienskap van sy werk is 'n nougesette teoretiese basis tesame met die ontwikkeling van praktiese algoritmes en gevolglike impak deur sagteware.

13. HAVENGAPRYS VIR LEWENSWETENSKAPPE

Die prys word toegeken aan **prof. Bernard Slippers**, wat verbonde is aan die Departement Biochemie, Genetika en Mikrobiologie, Universiteit van Pretoria. Hy is ook die direkteur van die Instituut vir Bosbou en Landboubiotegnologie (FABI) en die stigter van die Future Africa Institute.



Prof. Bernard Slippers

Prof. Slippers se navorsing fokus op die ekologie en evolusie van insekte en mikro-organismes wat plantgesondheid beïnvloed, asook die ontwikkeling van instrumente om die impak daarvan te verlig. Hy het reeds wye erkenning vir sy navorsing ontvang, waaronder 'n presidentstoekening. Benewens sy navorsingsbelangstelling is hy ook passievol oor wetenskapsontwikkeling en die rol van die wetenskap in die breër samelewing. In hierdie verband was hy betrokke by die wêreldwye Young Academy-beweging, 'n stigterslid van die Global Young Academy (GYA) in 2010 en die South African Young Academy of Science (SAYAS).

14. STALSPRYS VIR MAATSKAPLIKE WERK

Die prys word toegeken vir 'n hoogstaande publikasie of 'n reeks hoogstaande publikasies by voorkeur in Afrikaans, asook vir individuele of gesamentlike produkte van hoogstaande gehalte wat 'n buitengewone bydrae tot die wetenskapsbeoefening lewer.

Die prys word toegeken aan **prof. Antoinette Lombard**, die hoof van die Departement Maatskaplike Werk en Kriminologie, Universiteit van Pretoria.



Prof. Antoinette Lombard

As hoof van Maatskaplike Werk en Kriminologie is prof. Lombard een van die langsdienende departementshoofde by die Universiteit van Pretoria – 'n pos wat sy reeds meer as vyftien jaar met groot sukses beklee. Sy geniet veral internasionaal erkenning vir haar werk en is die programdirekteur vir die *Ubuntu Study Abroad Programme* saam met die Fordham Universiteit in New York, wat vir Suid-Afrikaanse studente die geleentheid bied om internasionaal ondervinding op te doen, en ook vir VSA-studente blootstelling aan die Suid-Afrikaanse konteks bied.

15. STALSPRYS VIR OPVOEDKUNDE

Die prys word vanjaar toegeken aan **prof. Bettie Wiechers**, emeritus professor van die Departement Opvoedkundige Studies, Unisa.

Prof. Wiechers was aktief betrokke by die vestiging van die vakgebied en professie van Opvoedkundige Sielkunde in Suid-Afrika. Tydens haar lang loopbaan in die opvoedkunde en sielkunde was sy onder meer hoogleraar by Unisa, sielkundige by die Kinderleidingklinik van die Universiteit van Pretoria, en ook by die Weskoppies Psigiatriese Hospitaal werksaam. Benewens haar omvattende akademiese kwalifikasies het sy haar ook as meesterpraktisyn in neurolinguïstiekprogramme in Londen gekwalifiseer.

16. STALSPRYS VIR STADS- EN STREEKSBEPLANNING

Die prys word toegeken aan **prof. J.J. (Das) Steyn**, emeritus professor van die Departement Stads- en Streeksbeplanning, Universiteit van die Vrystaat.

Die prys is aan prof. Steyn toegeken op grond van sy talle publikasies in Afrikaans, die belangrike rol wat hy in die beplanningsprofessie in Suid-Afrika gespeel het, en sy groot bydrae tot die beplanningsliteratuur en akademiese ontwikkeling van Stedelike en Streeksbeplanning.

17. EREPENNING VAN DIE FAKULTEIT NATUURWETENSKAP EN TEGNOLOGIE

Hierdie Erepennig word toegeken vir prestasies en bydraes ten opsigte van die bevordering en ontwikkeling van die besondere vakgebied en kan net in uitsonderlike gevalle toegeken word.

Die prys is toegeken aan **prof. D.G. Hattingh**, direkteur van eNtsa en professor in Meganiese Ingenieurswese, Nelson Mandela Universiteit in Port Elizabeth.



Prof. Danie G. Hattingh

Prof. Hattingh word vereer vir sy bydrae op die gebied van wrywingsweistegniek en gepaardgaande ontwikkeling van die ontleding van metaaltrubines en hoëdruk-/ hoë temperatuurpype. Hierdie tegnieke word tans as standaardprosedures toegepas deur beide Eskom en Sasol. Die tegnologiese bydrae van prof. Hattingh en die eNtsa-groep is van kardinale belang vir die veilige voorsiening van elektrisiteit in Suid-Afrika deur Eskom.

18. EREPENNING VIR ROLPRENTKUNS

Die Erepennig is vanjaar aan mnr. **Hans Strydom** toegeken.



Hans Strydom

In sy lang loopbaan van 47 jaar as rolprentakteur sedert die 1973-rolprent *Môre Môre* het Hans Strydom bewys dat hy 'n gesaghebbende akteur is wat bekroning deur die SA Akademie waardig is. Reeds met sy eerste rolprent was daar 'n onmiddellike aanvoeling vir die kamera; 'n onderspeelde gesag wat destyds maar selde voorgekom het, 'n akteur wat die visuele medium intuïtief verstaan, wat bewus is van waarna die kamera soek, en wat soepel met selfs moeilike dialoog omgaan. Verskeie rolle het gevolg waarin hy gewoonlik die stil, stewige held gespeel het met die vonkel in die oog en 'n charisma wat gehore in rolprente soos *Ter Wille van Christine* en *Liefste Veertjie* oorweldig het. Hy het diepte na rolle gebring wat dikwels nie in die draaiboek voorgekom het nie. Hy was ook nooit huiwerig om aan dialoog te verander of meer diepte na 'n karakter te bring wat 'n skrywer dalk sou misgekyk het nie. Mnr. Strydom word vereer vir die reusebydrae wat hy tot die vermaaklikheidsbedryf gelewer het.

19. EREPENNING VIR RADIODRAMA IN AFRIKAANS

Die Erepennig word toegeken aan **dr. Eben Cruywagen**.



Dr. Eben Cruywagen

Dr. Eben Cruywagen se werk het oor die jare 'n groot impak gehad op die ontwikkeling, uitbou en bevordering van radiohoorspele. Nie net is hy 'n gereelde aanbieder van RSG se radiodramaslypskole nie, maar ook 'n gevestigde beoordelaar en mentor vir die RSG Radiodramakompetisie. Hy is 'n uitmuntende radioregisseur, keur tekste vir uitsending en verwerk prosa en verhoogdramas vir uitsending. Dr. Cruywagen se verwerkings getuig van 'n besondere gevoeligheid vir die radioformaat. Sy keurige dialoogverwerkings en klanklandskappe wat hy in die verwerkings skep, tower 'n ryke verbeeldingswêreld by die luisteraar op. Hy bewerkstellig 'n fyn balans tussen humor, drama en patos en die karakters wat hy skep, lêwe binne die beperkte en soms belemmerende grense van radio as medium. Die prys word toegeken vir die voorafgaande, insluitend die tekste wat hy vir drama die afgelope drie jaar verwerk het.

20. DELEEN BEKKERPRYS VIR DIE BESTE DOKUMENTÊRE TV-DRAAIBOEK IN AFRIKAANS

Die prys word toegeken aan me. **Carien Loubser** vir die draaiboek *Madiba: 'n Uitsonderlike roeping*, Episode 1.



Carien Loubser

As die teksskrywer, regisseur en vervaardiger van *Madiba: 'n Uitsonderlike Roeping*, neem me. Loubser die kyker in hierdie nostalgiese en roerende dokumentêre reeks saam met die aanbieder, me. Zelda le Grange, terug na Nelson Mandela se jeugjare in die

landelike landskap van die Oos-Kaap, van sy geboortedorp, Mvezu tot by Qunu. Carien Loubser het hierdie historiese dokumentêr oor die kinderjare van een van die grootste leiers in Suid-Afrika in Afrikaans vervaardig en 'n sterk en uiters gepaste Afrikaanse teks daarvoor geskryf.

Die prys word bekostig uit die Deleen Bekkertrustfonds.

21. EREPENNING VIR 'N DOKUMENTÊRE TELEVISIEPROGRAM IN AFRIKAANS

Die Erepenning word toegeken aan die vervaardiger en regisseur, me. **Susan Scott** vir *Stroop*.



Susan Scott

Stroop is 'n dokumentêr, wat as argiefmateriaal die uiters belangrike saak van renosterstropery op nasionale en internasionale vlak belig. Die dokumentêr is onder uiters gevaarlike omstandighede plaaslik in wildtuine, privaatwildplase en op internasionale sluikhandelmarkte verfilm. Die navorsing is uniek, wydlopend en van kritieke belang. Ook die visuele en ouditiewe aanbiedingswyse, die kamerawerk, redigering en uitstekende strukturering van die dokumentêr is van uitstaande gehalte. *Stroop* slaag daarin om op nasionale en internasionale vlak 'n blywende impak uit te oefen. Erkenning word ook gegee aan Bonné de Bod, vervaardiger en aanbieder van *Stroop*.

22. SA AKADEMIEPRYS VIR VERTAALDE WERK

Die prys word toegeken vir vertaling in Afrikaans van belletristiese werk uit enige ander taal. By die beoordeling van die vertaling word gelet op die aansien wat die vertaalde werk binne sy eie letterkunde geniet en op die juistheid en algemene geslaagdheid van die vertaling.

Die prys word toegeken aan **De Waal Venter** vir *Vandag is boordensvol*, 'n vertaling uit Spaans van die gedigte van Pablo Neruda.



De Waal Venter

Navrae oor hierdie prys kan gerig word aan prof. Hennie van Coller.
E-posadres: vcollerh@ufs.ac.za of selfoonnr.: 082 825 9743.

23. EUGÈNE MARAISPRYS

Die prys word toegeken vir 'n eerste of vroeë letterkundige werk en word eenmalig aan 'n persoon toegeken.

Die prys word toegeken aan **Johan Jack Smith** vir *Zola*.



Johan Jack Smith

Die prys word hoofsaaklik geborg deur *Rapport*.

Navrae oor hierdie prys kan gerig word aan prof. Hennie van Coller.
E-posadres: vcollerh@ufs.ac.za of selfoonnr.: 082 825 9743.

24. **PROTEA BOEKHUISPRYS VIR DIE BESTE GESKIEDENISVERHANDELING IN AFRIKAANS EN DIE GENERAAL CHRISTIAAN DE WETBEURS**

Die prys word toegeken aan **mr. Ruhan Fourie**, verbonde aan die Universiteit Stellenbosch vir sy M.A.-verhandeling met die titel: Beyers Naudé 1915–1963: Die vorming van 'n dissidente Afrikaner.

Dit is verbasend dat daar nog nie 'n volledige biografie van Beyers Naudé geskryf is nie. Ruhan Fourie het hierdie uitdaging krities en met goeie historiese oordeel aangepak en 'n verhandeling geskryf wat fokus op Beyers Naudé se vroeë jare. Deur Naudé se jeugjare te herbesoek het hy daarin geslaag om 'n nuwe en beeldende narratief daar te stel wat Naudé as 'n veelkantige individu uitbeeld en 'n belangrike bydrae lewer om sy lewe meer volledig in te kleur. Gegewe die beleg waaronder Afrikaanse akademiese geskiedskrywing deels as gevolg van huidige politieke 'transformasie'-voorkeure verkeer, is hierdie 'n uitstekende voorbeeld van die gehalte akademiese werk wat nog deur Afrikaanssprekendes gelewer kan word.

Die prys word geborg deur Protea Boekhuis.

25. **DOUW GREEFFPRYS**

Die prys word toegeken vir 'n navorsings- of oorsigartikel van hoogstaande wetenskaplike gehalte wat in die *SA Tydskrif vir Natuurwetenskap en Tegnologie (SATNT)* gedurende die jaar wat die prys voorafgaan, gepubliseer is.

Die prys word vanjaar toegeken aan **prof. J.H. van Vuuren**, verbonde aan die Departement Bedryfsingenieurswese, Universiteit Stellenbosch, vir die artikel "Die effek van veelvuldige lynverwydering op die onafhanklikheidsgetal van 'n asikliese grafiek" wat verskyn het in die *SATNT*, 38(1) (2019).



Prof. J.H. van Vuuren

26. **ESTHER GREEFFPRYS**

Die prys word vir 'n navorsings- of oorsigartikel van hoogstaande wetenskaplike gehalte wat in die *Tydskrif vir Geesteswetenskappe* gepubliseer is, toegeken.

Die prys word toegeken aan **prof. Pieter J. Fourie** van die Departement Kommunikasiewetenskap, Unisa vir sy artikel "Die invloed van die digitale medialandskap op mediateorie: Van effekteorie tot mediatiseringsteorie" wat in die *Tydskrif vir Geesteswetenskappe*, Jg. 58, 4(1), Desember 2018, verskyn het.



Prof. Pieter J. Fourie

27. JUNIOR KAPTEIN SCOTT-GEDENKMEDALJE (Dierkundige Wetenskappe)

Die medalje kan jaarliks toegeken word vir die beste verhandeling wat by 'n Suid-Afrikaanse universiteit vir die M.Sc.-graad ingedien is (om die beurt in die dierkundige of plantkundige wetenskappe).

Die prys word vanjaar aan **mnr. Theo Busschau** van die Universiteit Stellenbosch toegeken vir sy verhandeling: Phylogeographic patterning of three co-distributed forest-dwelling reptile species along the east coast of South Africa.



Mnr. Theo Busschau

28. POORTPRYS

Toekenning van hierdie prys word jaarliks oorweeg vir die twee beste skeppende bydraes (poësie, prosa, drama) deur leerders in grade 10, 11 en 12.

Die prys word vanjaar toegeken aan:

Prosa: **Rachelle du Preez** van die Hoërskool Bonnievale vir haar werk *Daarbo?*



Rachelle du Preez

Poësie: **Suné Mostert** van die Hoërskool Diamantveld in Kimberley vir haar gedig *Die ruggraat*.



Suné Mostert

Die wenontwerp van die voorblad vir die Poortbundel is **Chrizelle Strydom** van die Hoërskool Uppington.



Chrizelle Strydom



Prof. Anne-Marie Beukes
Hoof Uitvoerende Beamppte
Selfoon: 083 675 8053
E-pos: ambeukes@akademie.co.za